

Alaves ♦ Ohiturari jarraituz, hil edo bizikoa izango da gaurko neurketa arabarrentzat

Gol zaparrada ahaztera

Belsue eta Julio Salinasen debutak arreta piztu du Gasteizen

Xabier Fernandez / Gasteiz

HIL edo biziko partidua dela esatea ia soberan dago, horixe izango baita Alavesen patua denboraldia amaitu arte. Gaurko norgehiagokak duen alderik nabarmenak izen jakin batzuekin du lotura, Belsue eta Julio Salinasen debutak ikusmina piztu baitu Mendizorrotzan. Bertirekin batera, Barcelonaren aurka hartutako gol zaparradaren oihartzuna isiltzen saiatuko dira fitxatu berriak eta baita gainerako kideak ere.

Ohiko sistemari eutsiko dio Jose Manuel Esnal *Mane*-k, baina indar gehiago izango du hegal bietan, orain atera dezakeen zelai erdirik indartsuena eta aurrelari garaiak. Canabalek erdi-puntako lana beteko du ziurrenik, eta hortik askozaz min handiagoa egin dezake galziarrak. Haren aurretik, Julio Salinas.

Espanyolek arnasa hartu zuen joan den igandean Salamancan 2-3 irabazita, are gehiago 2-0 galtzen joan ondoren. Brindisi entrenatzaileak Esnaider berreskuratu nahi du, Nan Ribera zelai erdian kokatzeko. Pochettinoren hutsunea Ivan Helguera beteko du.

Partiduko epailea Fernandez Marin valentziarra da. Alaves ez du inoiz zuzendu, eta denboraldiko zortzigarren partidua izango du gaurkoa. Aurreko zazpitan bi aldiz irabazi du etxeko taldeak, beste bitan kanpokoak eta gainerako hiruretan berdinketarekin amaitu dira norgehiagokak.

Espainiako Lehen Mailako 17. jardunaldia			
ALAVES		ESPANYOL	
Entrenatzailea: Jose Manuel Esnal		Entrenatzailea: Brindisi	
Aurkaria: 19.10.99, 7.00		Aurkaria: 20.10.99, 21.00	
Etxekoak: 1. Belsue, 2. Alfonso, 19. Santi Revilla, 22. Joseba		Kanpokoak: 2. Inubasi, 1. Berdudu, 5. Caldu, 9. Celak alde, 12. Celak kontra	
Orekorrean: 18. Puntuak: 18		Orekorrean: 19. Puntuak: 19	



Canabalek Julio Salinasen laguntza izango du gaur Mendizorrotzan.

Antonio Karmona • ALAVESEKO JOKALARIA •

«Etxeko partidua finalak dira»

ALAVESEKO kapitainaren ustez, erabat ahazturik dago Camp Nouko porrota.

■ **Ia soberan dago partidua duen garrantzia azpimarratzea...**

Oso garrantzitsua da, etxean derrigorrean irabazi behar dugulako. Etxetik at puntuak lortzen ez dituzunean, etxeko partidua finalak balira bezala jokatu behar dira.

■ **Beraz, min egin zuen joan den igandekoak?**

Min egiten du, eta handia gainera, baina aurrera begiratu behar dugu, beste erremediorik ez dagoelako. Horregatik, oso garrantzitsua da Espanyolen aurkako partidua, ahaztu ahal izateko eta gure borrokan segitzeko.

■ **Nola ikusten duzu aurkaria?**

Kalitatea du Espanyolek. Esnaider eta Tamudo ezagutzen ditugu. Lasaiago egongo dira Salamancan hiru puntu garrantzitsu irabazi ondo-

ren, eta ustezko lasaitasun hori aprobetxatu beharko genuke.

■ **Fitxaketek estali bide dute Bartzelonako gol zaparrada?**

Taldeko jokalariorik ahaztua dugu astearteaz geroztik Bartzelonan gertatutakoa. Berrien etorrerarekin, ziur aski eskarmentua ere irabazi dugu. Guztiek duten eskarmentua primeran etorriko zaigu sailkapenean gora egiteko.

Oroimen historikoaren ahultasuna

Xabier Fernandez

Neguko epea eta, zehazki, gaur bukatuko zaigun aste primeran etorri zaio Alavesi. Astelehen arratsaldeko aurkezpenaz baliatu ziren gasteiztarrok oroimen historikoaren ahultasuna erakusten hasteko, aurreko jardunaldiko gol zaparrada ahaztarazteko.

Badaezpada, Belsuek ere lagundu zuen astearteaz, eta, Julio Salinas eta Bertirekin batera —Mane dixit—, Errege Magoena bete zuen asteazkenean, Gasteizetik at egon arren. Etxetik at 7-1 galdu ondoren, Gasteizko zaleek berebiziko aukera dute gaur fitxaketa pare bat ikusteko eta itxaropena berreskuratzeko.

Guztia, gainera, poltsikoa astindu gabe. Dirua datorren astean eskatuko die zuzendaritzak, denboraldiko lehendabiziko derbia ikustearen truke. Tamalez, zaleek ez dute gogo berezirik izango txarteldegietatik pasatzeko Espanyoli irabazi ezean. Horregatik, ezinbestekoa da gaur oroimen historikoaren ahultasuna zertan datzan erakustea: ez da gol zaparradarik jaso orain dela aste bat, eta fitxaketak egin ez balira bezala ekin behar dio partiduari Alavesek. Iritsi berriak jokalaria hutsak baitira, ez jainko ahalguztidunak.



JOSEBA OLALDE